

LIS PREDICJIS DAL MUINI

di pre Josef Marchet - Udin, 1965

La cause des gosis

Doman messe aes vot. O vin in paîs, par cualchi dì, pre Josef Cuful, che al è a cjase par vie di sô mari che i è vignût un flamon intune gjambe. E cussì, di chê bande, midiant che doman al è San Blâs, us fasarà la benedizion dal cuel. Oh cheste volte o soi sigûr che mi jemplarês la glesie, par vie che a Gargagnà di 'Sore a son plui gosis che no personis. E nol covente ridi! Jacum di Cecut, là vie, par esempi a 'nd à dôs: une par bande par compagnâ il pês; la none di Zanel a 'nd à un rap, come i dindis di grasse; Toni Brucjot a 'nd à une sole, ma si trate di un sampogn di chilo, che no i sta dentri la fassete de cjamese.

Savêso ce che o ai di dius? Va ben la benedizion dal cuel, ma des gosis o seis ancje colpe bessôi. Cuant che une femine e scomence a sberghelâ sul prin cricâ dal dì o cu la canaie o cul om o cu lis cugnadis o cu lis gjalinis o cu lis cjavris o cul diaul che la puarti, e fin sere e rintrone dut il borc, cence molâ un marilamp, si capîs che la gnervidure dal gargat si sfuarce, si distire, e fâs sac, juste apont come ai crots des poçatis. Sparagnaitlu chel flât, malandretis di cuarnetis, che Diu mal perdoni! E se no berghelin a tabain, e se no tabain a cjantucin, ur je sclapât il glutidôr.

E i oms? Ancje chei a son colpe bessôi; e magari piês! A fasin chel got di vin e, invezit di tignîlu cont pe stagjon dai lavôrs pesants, sal scolin un bocâl daûr che altri, vie pal Unvier, che a Pasche no 'nd è plui une gote. Po dopo a vegnin lis setemanis che al tocje fruiâsi i vues di un scûr a chel altri, cuant che a son i prâts di seâ, il forment di seselâ e trebiâ, il sorc di ledrâ, lis vîts di spompelâ; e alore ju aghe a selis pe agadorie: chê agate di risultive che e ven fûr dal pantan, indulà che magari a nassin i cudui o che si unîs a cjantâ la assemblee des 'savis, tant che i coscrits inte ostarie di Florean Baduscli! O sfidi jo che si ur ingolfe l'acuedot! Se a vessin tant cjâf di meti in bande un caratelut di nostran par resentâsi il glutidôr su la colme dai lavôrs, sal sintaressin a rivâ par dutis lis comissuris come la scosse eletriche, a lavoraressin il dopli e inmò ur vanzarès flât. E il vin furlan nol fâs vignî fûr gosis a nissun, ma lafè no.

E cun cheste us doi la buine sere.